

## ARLeF: la acuire de Patrie e svolte sul Stadi Friûl

*Consegnât un ricognossiment speciâl ae coreografie create de Curve Nord in ocasion de partide dai 7 di Avrîl*

Ae ARLeF no i è scjampade la **coreografie che i tifôs de Curve Nord dal Udin a àn organizât tal Stadi Friûl in ocasion de partide cul Empoli dai 7 di Avrîl passâts (zornade che propit a Gurize si fasevin lis celebracions uficiâls de Fieste de Patrie dal Friûl)** e vinçude dai blancs e neris cul risultât finâl combatût di 3 a 2. E nol podeve che jessi cussì, stant che e je stade disrodolade e animade une acuire zale fate di trê draps distints, simbul storic de Patrie dal Friûl, suntun mâr di têt blu, cuntune scrite par furlan in ricuart de nassite dal stât patriarcjâl, ai 3 di Avrîl dal 1077, par une superficie di plui di 320 metris cuadris. Ducj i 5.000 tifôs de Curve Nord a jerin stâts mobilitâts dal grup dai Ultras 1995, coordinâts di Carlo Urli.

La Agjenzie Regjonâl pe Lenghe Furlane e à volût alore **premiâ l'impegn e la passion cuntun ricognossiment simbolic**, consegnât dilunc di une cerimonie che e je stade fate di pôc te sede de Agjenzie. **Une targhe che e rimarce la braûre di apartignince al Friûl e ae sô lenghe, dimostrate dai Ultras 1995 e di dute la Curve Nord.**

*«Pe ocasion, si sin ispirâts a di une coreografie simile che a so timp e jere stade organizade dai tifôs gjenoans, cul lôr variûl - al à sclarît Carlo Urli, che al à ritirât il ricognossiment insiem cuntun grup di tifôs -. Une ventine di personis dal grup si son metudis sot, lavorant par 10 dîs di file, otignint ae fin - cu la colaborazion di dute la curve - un risultât spettacolâr. O volevin fâ une sorprese ae scuadre e ai tifôs, proponint alc di diferent e, mi pâr che o vin rivât adore a fâlu».*

Aes ativitâts dal grup di tifôs - nassût intal 1995 - a partecipin une otantine di personis di etât varie e che a vegnin di dut il Friûl-VJ. Un leam di amicizie che si esalte inte preparazion di coreografiis che, dispès, a àn tant che teme il Friûl e lis sôs carateristichis plui veris e profundis.

*«La coreografie leade ae ricorence dai 3 di Avrîl e je vignude fûr propit ben - al conclût Urli -. Finide la partide, tancj tifôs nus àn fermât par fânus i compliments, e cualchidun al veve fin lis lagrimis tai voi. O vin cetant gust pal ricognossiment vût de ARLeF. La lenghe plui fevelade tra di nô e je il furlan, e ogni ocasion e je buine par fâle cognossi lant ator pe Italie e pe Europe. O cjapìn dentri in particolâr i zovins par rimarcâur cetant che al sedi impuartant coltivâ lis nestris lidrîs».*

Udine, ai 26 di Avrîl dal 2019

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
 Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<